

# INUIT ATAQATIGIIT

## INATSISARTUNI



EM 2013/39  
2. oktober 2013  
Naaja H. Nathanielsen

**Suliffeqarfiit namminersortut pitsaasumik, inerititaqarfiusumillu iliuuseqartut, avatangiisinut mingutsaaliuinerikkut, nukissiuutit mingutsitsinngitsut atornerisigut, aammalu CO2-mik aniatitsinermikkut annikillisaasut akissarsisinneqartalernissaannik Naalackersuisut sulissuteqaqqullugit Inatsisartut aalajangiiffigisassaattut siunnersuut**

(Inatsisartunut ilaasortat Siverth K. Heilmann aamma Gerhardt Petersen, Atassut)

Atassutip siunnersuutaa Inuit Ataqatigiinnit iluarinartipparput. Siunnersuut nunatsinni suliffeqarfiit namminersortut avatangiisit artorsaatissinneqarnerannik millisaanissaminut kajumissuseqalersinneqarnissaannut tunngalluinnarpoq.

Siunnersuulli taamatut isikkoqarallartillugu Inuit Ataqatigiinnit tapersersorsinnaanngilarput, kisiannili allannguutissamik siunnersuusiortoqarnissaa pillugu ataatsimiititaliamut suliarisassanngortillugu innersuussutigerusupparput.

Siunnersuutip siunertarisaa tapersersorusupparput, tassa avatangiisit pillugit suliffeqarfiit namminersortut immikkut ittumik iliuuseqarusuttut pitsaanerusunik sinaakkutassaqalersinneqarnissaat. Naalackersuisut isumaqatiginngilagut avatangiisinut mianerinninneq pillugu ukiumoortumik akissarsisitsisarneq periarfissatuatut naammattoq.

Tamatumunnga taarsiullugu Inuit Ataqatigiit tungaannit Naalackersuisut qinnuigissavagut suliffeqarfiit namminersortut periarfissaminik pitsaasumik ataatsimut isiginninnissaminut sakkugisinnaasaannik siunnersuusioqqullugit. Pisortat tungaannit ukiuni kingulliunerusuni suliniutinik assigiinngitsunik aallartitsisoqartarsimavoq suliffeqarfiit namminersortut avatangiisinut mianerisaqarnerulernissaannik kaammattuutaasinnaasunik: nukimmik sipaarnermut siunnersortit, nukissiuutinik ataavartunik misileraanerit assigiinngitsut, tapiissutit assigiinngitsut, kiisalu avatangiisinik pitsanngorsaanerit siunertaqartut akissarsitsisarnerit aningaasaateqarfiillu arlaqartut.

Inuit Ataqatigiit tungaannit toqqaannartumik allannguutissatut ima siunnersuuteqassaagut: *“Suliniutit tapiissutillu avatangiisinik pitsanngorsaanissamik siunertaqartut tamaasa allaaserlugit, aammalu tamakkuninnga nalilersuillutik, Inatsisartunut Naalackersuisut nalunaarusioqqullugit Inatsisartut aalajangiiffigisassaattut siunnersuut. Nalunaarusiaq UPA 14-imut naammassineqareersimassaaq aammalu 2015-imut aningaasanut inatsisissatut siunnersuummik suliarinninnermut atatillugu tulleriarinissamut tunulequtaasinnaasariaqassalluni.”*

Taamatut oqaaseqarluta siunnersuut Avatangiisinut Ataatsimiititaliamut suliarisassanngortillugu innersuussutigaarput.